

# 佛說迴向輪經

于闐三藏尸羅達摩於北庭龍興寺 譯



南無本師釋迦牟尼佛

## 說明

本繁體校正版《佛說迴向輪經》电子书，根據《高麗大藏經》宋續入藏經，第 1405 部，于闐三藏尸羅達摩於北庭龍興寺譯《佛說迴向輪經》影印本校正，句讀僅供參考。

本電子書是免費結緣品，特此說明。

仁慧草堂

二〇一九年三月



掃碼關注仁慧草堂微信公眾號

## ●起誦儀

### 香讚

(一編)

爐香乍爇. 法界蒙薰. 諸佛海會悉遙聞. 隨處結  
祥雲. 誠意方殷. 諸佛現全身.

南無香雲蓋菩薩摩訶薩 (合掌三稱)

南無本師釋迦牟尼佛 (合掌三稱)

### 開經偈

(一編)

無上甚深微妙法 百千萬劫難遭遇  
我今見聞得受持 願解如來真實義

# 佛說迴向輪經<sup>1</sup>

于闐三藏尸羅達摩於北庭龍興寺 譯

如是我聞：

一時，佛在大摩尼金剛寶山峯中，與大菩薩衆俱。

爾時，世尊告金剛摩尼菩薩言：「佛子，若有菩薩，求大菩提，爲欲救度一切有情，已受菩薩律儀戒學，已曾發起大菩提心，有大悲愍，常欲奉事一切如來，欲廣積集諸大菩薩福德資糧，欲證佛智，欲以無礙等持、摠持、諸解脫門神通遊戲，欲令虛空成大庫藏，欲令自手似如意寶，作是奉施：『唯願一切諸佛世尊，已住十地諸大菩薩，持金剛者，當憶念我。弟子某甲已發菩提心，未安住正道，今持身心，於一切時，以一切種，奉施三世諸佛菩薩。願大自在諸佛如來，已證大地一切菩薩，當攝受我，令我大福德智慧資糧，猛利精進，廣大心量，寂靜調伏，神通自在，波羅蜜多速得圓滿。』

「復作是言：『唯大悲者，當憶念我。弟子

<sup>1</sup> 本經錄于麗藏，明藏及清藏未有錄。

某甲墮在生死，繫以大縛，閉居牢獄，離正道法；逼以彊力煩惱怨敵，無怙無救，無目無依，無將無導，遊行僻路，趣向生死，背大涅槃，順諸惡趣，將墮險路；臨仆惡道，常遇惡友，離善知識，迷於邪正；有利無利，有義無義；遠離諸善，成就不善，常背賢聖諸佛菩薩；生、老、病、死、憂惱所迫，不得安隱無怖無畏；心常散亂，闕修寂靜、調伏、施、戒及不放逸，遠離等持摠持二門、十地法忍，不能安住甚深般若波羅蜜多及平等性；不修無量慈悲喜捨，不具菩薩三聚戒蘊，遠離無障無礙大智；不能安住於寂滅因，善成立法，遠離神通力無所畏；不住正念，不能成就隨行趣入無忘失法；匱諸功德，見取疑惑，障於通達七等覺支；闕修如實八聖道支，無量百千苦惱所逼，而常熾然，衆苦逼迫，心常下劣，忿恨散亂，常順煩惱。唯願一切諸佛菩薩，依大悲愍，爲我救護，爲我歸依，爲我導師。唯願令我速得圓滿大正覺路、大菩提道、菩提資糧。又願令我速得圓滿如來十力、四無所畏、十八不共諸如來法、無礙辯才、等持、解脫、陀羅尼門功德、神通波羅蜜多。又願與我一切成就、一切功德。』

「復次，爲轉廣大供養，應作是言：『又願

一切諸佛世尊，已得大勢諸菩薩衆，當憶念我。弟子某甲今於一切佛菩薩所，轉大恭敬承事供養，以身奉獻所有十方諸世界中大莊嚴具，所謂種種寶宮，諸寶莊嚴——寶樹、寶山、寶座、寶壇，珍寶行列；寶蓋、寶幢、寶飾、瓔珞、眞珠、羅網、寶器、寶聚，積寶光焰；諸寶洲中大末尼寶清淨燈樹，寶鈴和鳴，末尼光曜，眞金纓拂，垂覆連接妙金蓮花，閻浮檀金以爲其鬚，金樹行列；種種寶宮，寶雲鬣鬣，雨衆寶涕；諸寶藏殿，衆妙末尼間錯牆壁，寶珠欄楯；大持明者可樂園苑，屋宅、寶宮、殿堂、樹林，皆可愛樂。以如是等無攝無受迴向一切諸佛菩薩。

『於瞻部洲，所有妙藥、長壽藥類、諸末尼寶、能與有情所求衆藥、自然成美殊勝飲食，并諸香樹，種種異類旃檀妙樹、阿伽盧樹、沈水赤檀、大葉恒花、能醉香等諸樹種類，可樂妙香無攝無受諸如意樹；於大海中，種種異類諸末尼寶、如意寶珠，及須彌山、鷄娑羅山、香山、摩尼耶山、尹地<sub>合</sub>耶大山、曼陀羅山、金剛山等諸大山中種種寶峯、寶臺、寶石、寶窟、寶宮、寶飾、寶片、衆寶階道，諸末尼柱、諸寶燈輪、諸瑠璃等末尼種類；所有天上無主天宮、天諸名花、悅

意樂見天諸樂具、微風吹動空宮行伍和鳴美聲、天諸音樂不鼓自然出美妙聲、天諸衆鳥住空宮中鳴妙音聲并諸寶雲出大美聲、天諸末尼歌詠音樂并諸妙香花樹、鬘樹、塗香燒香樹、燈樹、幢樹、幡樹、寶樹，此等一切無所攝受，奉施一切諸佛菩薩。

『所有一切佛眼所睹諸佛刹中大供養雲、花雲、香雲、鬘雲、燒香雲、塗香雲、寶蓋雲、寶幢雲、寶幡雲、寶衣雲、寶聚雲、寶器雲、大末尼聚雲、種種微妙大寶珠雲；又以香油，滿大燈器，量等千界，燃以燈炷，量百須彌，奉施一切諸佛世尊、諸大菩薩。』

『由是供養所生勝福，竝將迴向無上菩提，如過去佛所修諸善，以無所得而爲方便，迴向菩提；我亦如是，持此功德，迴向無上正等菩提，勸請諸佛。唯願往赴菩提道場，降伏魔怨，證大菩提，轉大法輪，欲滅度者，爲諸有情，勸請願住滿一大劫，隨喜一切諸佛菩薩、一切有情所修諸福，發露懺悔一切諸罪，猶如三世諸佛菩薩懺悔罪障，我亦如是，願罪銷滅。』

「奉施乃至懺悔已畢，卽以淨心，憶念一切諸佛、菩薩，對佛像前，誦此密言，滿足八遍。

密言曰：

唵娑頗<sub>二合</sub>羅娑頗<sub>二合</sub>羅微摩那娑<sub>去引</sub>囉摩訶<sub>引</sub>若縛  
吽

「誦密言已，即便隨欲成就天妙大供養雲，一切佛所而得現前。若善男子、或善女人，繫念於佛，或晝或夜，轉誦如是大迴向輪，此善男子、或善女人，諸罪銷滅，一切煩惱漸得微薄，能獲如前所說功德。若轉一遍，得百梵福，夢常見佛，命終之後，得生淨土。」

佛說是經已，諸菩薩眾歡喜奉行。

佛說迴向輪經

丙午歲高麗國大藏都監奉勅雕造

## ● 結誦儀

### 補闕圓滿真言

(三編)

唵. 呼嚧呼嚧. 社曳穆契. 莎訶

### 普回向真言

(三編)

唵. 娑麼囉. 娑麼囉. 弭麼曩. 薩嚩訶. 摩訶斫  
迦囉嚩吽

南無本師釋迦牟尼佛 (合掌三稱)

南無護法諸天菩薩 (合掌三稱)

### 迴向偈

(一編)

願以此功德 莊嚴佛淨土  
上報四重恩 下濟三途苦  
若有見聞者 悉發菩提心  
盡此一報身 同生極樂國

十方三世一切佛. 一切菩薩摩訶薩. 摩訶般  
若波羅蜜.

## 三皈依

(一編)

自皈依佛，當願眾生，體解大道，發無上心；  
自皈依法，當願眾生，深入經藏，智慧如海；自  
皈依僧，當願眾生，統理大眾，一切無礙。和南  
聖眾。



此咒置經書中可滅誤跨之罪

南无护法韦驮尊天菩萨

